

INUIT ATAQATIGIIT INATSIARTUNI



UKA2021/029, 047 & 073

Oktobarip 19-iat 2021

Mariia Simonsen

**Meeqqat, inuusuttut inersimasullu akornanni naqinnernik
ilisarinnissinnaanngitsut aamma atuarnermik allannermillu
ajornartorsiuteqartut pillugit nuna tamakkerlugu iliusissanik
pilersaarusiornissamut Naalackersuisut peqquneqarnissaannik
Inatsisartut aalajangiiffigisassaattut siunnersuut.**

(Inatsisartunut Ilaasortaq Sofia Geisler, Inuit Ataqatigiit)

**Naqinnernik ilisarsisinnaanngitsunut Kalaallisut programimik ikiuutinik
sanasoqarsinnaanissaa pillugu nalunaarusiamik Naalackersuisut
suliaqaqqullugit peqquneqarnissaannik Inatsisartut
aalajangiiffigisassaattut siunnersuut.**

(Inatsisartunut Ilaasortaq Aslak W. Jensen, Siumut)

**Inatsisartut isummerfigisassaattut siunnersuut Naalackersuisut
peqquneqassasut kalaallisuumik naqinnernik
ilisarinnissinnaanngitsunut misissuummik ineriartortitsisoqarlunilu
atuutilersitsisoqarnissaannik meeqqat atuarfianni ilinniarfinnilu
ingerlariaqqiffiusuni atorneqartussatut.**

(Inatsisartunut Ilaasortaq Nivi Olsen, Demokraatit)

Naalackersuisut peqquneqarnissaannik siunnersuutit pingasut naqinnernik
ilisarinnissinnaannginnermut allatigulluunniit atuarnermik allannermillu
ajornartorsiuteqarnermut tunngasut Inatsisartunut saqqummiunneqarmata
Inuit Ataqatigiinnit nuannaarutigaarput. Soorlu saqqummussinermi
siunnersuuteqartullu ilaannit oqaatigineqartoq ukiut qulit matuma siornali

INUIT ATAQATIGIIT INATSIARTUNI



Inatsisartut aalajangereerput naqinnernik ilisarinnissinnaangitsut ikiorserneqarnissaat siunertaralugu iliuusissanik pilersaarusiortoqassasoq. Maanna ukiut qulit qaangiutillartullu nuna tamakkerlugu iliuusissanik pilersaarusiornissaq Inatsisartunut aalajangiiffigeqquneqarpoq. Siunnersuutit saqqummiunneqartut pingasut tamaasa Inuit Ataqatigiinnit ilalerpagut, ilaanullu marlunnut Naalakkersuisut allannguutissatut siunnersuutaat Inuit Ataqatigiinnit aamma ilalerparput.

Nunatsinni meeqqat, inuusuttut inersimasullu naqinnernik ilisarinnissinnaangitsut qasserpiaanersut ilisimaneqanngilaq, ikigisassaanaviangitsulli ilimagaarput. Taama innarluuteqartut allallu atuarsinnaanikkut allassinnaanikkullu ajornartorsiuteqartut atugaat, aporfigisartagaat taakkunungalu unammillernartut suunerat siunnersuuteqartunit Sofia Geislerimit, Aslak W. Jensenimit Nivi Olsenimillu erseqqissumik paatsuugassaangitsumillu oqaluttuarineqareerput, maanilu uteqqissanngilakka.

Inuit Ataqatigiinni naatsorsuutigaarput naqinnernik ilisarinnissinnaangitsunut assigisaannillu ajornartorsiuteqartut atugaat siunissami malunaatilimmik naammaginarnernulissasut, taamalu ajornartorsiuteqartut pisinnaatitaaffitik naapertorlugit inuiaqataasutut tamakkiisumik misigisimalernissaat anguneqarsinnaalissasoq. Nuannaarutigaarput siunnersuutit pingasuusut ataatsimoortillugit Naalakkersuisut ilassilluarmatigik, kingullernullu marlunnut tunngatillugu allannguutissatut siunnersuutaat Inuit Ataqatigiinnit ilalerpavut.

Taama oqaaseqarluta siunnersuutit ataatsimiititaliamit susassaqartumit suliarineqarnissaat innersuussutigaarput.